



DET KONGELEGE
JUSTIS- OG BEREDSKAPSDEPARTEMENT

Jølster kommune

6843 SKEI

Dykkar ref.
SRØ 2013000655-26

Vår ref.
17/3058

Dato
24.05.2017

Klage frå Jølster kommune over Politidirektoratet si avgjerd av 13. januar 2017 om endringar i den lokale strukturen i Vest politidistrikt

Justis- og beredskapsdepartementet syner til klage som er dagsett 8. mars 2017 frå Jølster kommune og Politidirektoratet si avgjerd 13. januar 2017 om å endre politiet sin lokale struktur i høve til Jølster kommune:

«Sammenslåing av Flora politistasjonsdistrikt og lensmannsdistriktene Bremanger, Førde og Naustdal, Gloppen, Jølster, Fjaler, Hyllestad, Gaular, Askvoll, Balestrand, og Høyanger, til Sunnfjord lensmannsdistrikt. Lensmannsdistriktet har følgende tjenestesteder: Flora politistasjon, Bremanger lensmannskontor, Førde lensmannskontor, Gloppen lensmannskontor, Fjaler lensmannskontor og Høyanger lensmannskontor.»

Politidirektoratet har i brev 28. mars 2017 sendt klagen frå Jølster kommune til Justis- og beredskapsdepartementet, med kopi til Jølster kommune og Vest politidistrikt. Direktoratet opplyser i oversendinga at klagen frå Jølster kommune har vore lagt føre dei kommunar som saka vedkjem, jf. forskrift om klageordning for kommunar som berøres av ny tjenestestedsstruktur i politi- og lensmannsetaten § 5 andre ledd.

1. Bakgrunn

Nærpolitireforma, Prop. 61 LS (2014-2015), vart godkjent i statsråd 6. mars 2015 og sendt Stortinget for handsaming. Proposisjonen vart fastsatt 10. juni 2015 med nokre

Postadresse
Postboks 8005 Dep
0030 Oslo
0030 Oslo

Kontoradresse
Gullhaug Torg 4a
0484 Oslo

Telefon - sentralbord
22 24 90 90
Org.nr.: 972 417 831

Politiavdelinga
Telefaks
22 24 95 30

Sakshandsamar
Karl-Vidar Solberg
+4722245570
Karl-Vidar.Solberg@jd.dep.no

endringar, jf. Innst. 306 S (2014-2015) og Innst. 307 L (2014-2015). I Innst. 306 S (2014-2015) vart det mellom anna sagt følgjande om det overordna målet med nærpolitireforma:

«Målet med reformen er et nærpoliti som er operativt, synlig og tilgjengelig, og som har kapasitet og kompetanse til å forebygge, etterforske og påtale kriminelle handlinger og sikre innbyggernes trygghet. Det skal utvikles et kompetent og effektivt lokalt nærpoliti der befolkningen bor. Samtidig skal det utvikles robuste fagmiljøer som er rustet til å møte dagens og morgendagens kriminalitetsutfordringer».

Justis- og beredskapsdepartementet har i samsvar med dette gjeve Politidirektoratet mynde til å fastsette politidistrikta si inndeling i lensmanns- og politistasjonsdistrikt, og til å kunne fastsette samanslåing eller nedlegging av lensmannskontor og politistasjonar.

Politimeistrane har, som ein del av nærpolitireforma, greidd ut og føreslått endringar i politidistrikta sin lokale struktur for å kunne frigjere tid og ressursar til å kunne vere meir tilgjengeleg og til stades i nærmiljøa. Den lokale strukturen i politidistrikta skal fremje eit nærpoliti som er operativt og synleg, med kapasitet til å forebygge, etterforske og påtale strafflagde handlingar. Politimeistrane sine framlegg er mellom anna tufta på innspel frå kommunar og lokale polititenestemannsorganisasjonar.

Politimeistrane sende sine tilrådingar til Politidirektoratet 15. desember 2016. Politidirektoratet fastsette 13. januar 2017 ny lokal organisering av norsk politi.

Kommunar som vedkjem endringar i inndelinga i lensmanns- og politistasjonsdistrikt og samanslåing eller nedlegging av lensmannskontor eller politistasjonar kan klage på Politidirektoratet si avgjerd til Justis- og beredskapsdepartementet, jf. forskrift av 22. juni 2016 om klageordning for kommuner som berøres av ny tjenestestedsstruktur i politi- og lensmannsetaten § 1.

2. Merknadar frå kommunen

I brevet 8. mars 2017 frå Jølster kommune er det mellom anna gjort gjeldande at lensmannskontoret ligg midt i fylket og at stamvegane E39 og rv5 møtast i kommunesenteret Skei.

Kommunen har vidare gjort gjeldande at den store gjennomgangstrafikken gjer at ulykkestalet i kommunen er større en det innbyggartalet skulle tilseie. Difor er det viktig for Jølster kommune at politiet har kort utrykkingstid til skadestadane.

3. Synspunkt frå andre kommunar

Politidirektoratet har opplyst at ikkje nokon av dei andre 54 kommunane i Vest politidistrikt har fremja synspunkt på klagen frå Jølster kommune.

4. Politidirektoratet si vurdering

Politidirektoratet har i brev 9. mars 2017 til Justis- og beredskapsdepartementet gjort nærare greie for sitt avgjerdsgrunnlag og har ikkje funne grunn til å gjere om si avgjerd i høve til Jølster kommune.

Politidirektoratet har synt til at avgjerda 13. januar 2017 om samanslåing av teneststader i Sunnfjord lensmannsdistrikt er bygde på tilrådinga frå politimeisteren i Vest politidistrikt. Tilrådinga frå politimeisteren byggjer på politifaglege vurderingar og ein lokal prosess som kommunar og tenestemannsorganisasjonar har teke del i.

Politidirektoratet har vidare synt til at direktoratet har vurdert dei innspel og synspunkt som har kome fram i klagen frå Jølster kommune og frå politimeisteren i brev 13. mars 2017. Politimeisteren har i brevet skildra korleis politiet sine tenester skal tryggjast i Jølster kommune etter samanslåing av lensmannskontora. Politidirektoratet meiner at politimeisteren har gjort gode politifaglege vurderingar som høver med siktemålet til nærpolitireforma.

Politidirektoratet har difor konkludert med at det ikkje ligg føre opplysingar som gjev grunn til å endre den vurderinga som ligg til grunn for politimeisteren sin tilråding om endringar i den lokale strukturen i Vest politidistrikt.

5. Justis- og beredskapsdepartementet si vurdering og avgjerd

Klagen er satt fram i samsvar med forskrift av 22. juni 2016 om klageordning for kommuner som berøres av ny tjenestestedsstruktur i politi- og lensmannsetaten. Etter § 1 i forskrifta kan kommunar som vedkjem avgjerda om ny tenestestedsstruktur klage på avgjerda til Justis- og beredskapsdepartementet.

Vidare følgjer det av forskrifta at Justis- og beredskapsdepartementet kan gjere nytt vedtak eller heilt eller delvis oppheve avgjerda og sende saka attende til direktoratet for ny handsaming, jf. forskrifta § 6 første ledd.

Elles må departementet si klagehandsaming oppfylle krav etter forvaltningslova kapittel II og III og ålmenne reglar om god forvaltningsskikk, jf. forskrifta § 7.

Politidirektoratet har i oversendinga gjort greie for den føregåande prosessen i Vest politidistrikt, som mellom anna syner at politimeisteren har hatt ein omfattande lokal prosess med deltaking frå kommunar og tenestemannsorganisasjonar.

Det følger av politimeisteren sitt brev frå 13. mars 2017 at dei 53 kommunane i Vest politidistrikt vart invitert inn i styringsgruppa 17. juni 2016. Politidistriktet hadde også kontakt med KS både i Sogn og Fjordane og Hordaland fylke. Nokre kommunar var budd på å verte representert gjennom kommunale samarbeidsorgan, men dette var ikkje noko eintydig bilete. Politimeisteren valde difor å halde seg til kvar einskild kommune, samstundes som kommunale samarbeidsorgan og fylkeskommunane vart invitert til samling og møter i styringsgruppa.

Vidare er det opplyst at politimeisteren heldt åtte styringsgruppemøte mellom 28. april og 28. november 2016, der kommunane og kommunale samarbeidsorgan var til stades på to av møta. Politimeisteren arrangerte i tillegg eit dialogmøte med kommunane og kommunale samarbeidsorgan i Førde i Sunnfjord 24. august 2016.

I tillegg til orientering frå politimeisteren og prosjektleiar om nærpolitireforma og status i arbeidet med nytt politidistrikt, vart det halde gruppevis dialog mellom driftseiningsleierane i politidistrikta og ordførarar/rådmenn for å avklare deira forventningar til nærpolitireforma. Jølster kommune har ikkje klaga på den føregåande prosessen.

Jølster kommune har som nemnt ovanfor gjort gjeldande at lensmannskontoret ligg midt i fylket og at stamvegane E39 og rv5 møtast i kommunesenteret Skei. Den store gjennomgangstrafikken gjer at ulykkestalet i kommunen er større enn det innbyggartalet skulle tilseie. Difor er det viktig for Jølster kommune at politiet har kort utrykkingsstid til skadestadane.

Departementet syner her til at politimeisteren i sitt brev 13. mars 2017 har halde fram at Jølster lensmannskontor har ein sivil stilling og to politistillingar, medrekna ein politistilling som ikkje er operativt godkjent. Departementet er samd med politimeisteren i at dei operative ressursane som kontoret har i dag kan nyttast langt betre om dei koplast til større einingar.

Politimeisteren held vidare fram at avstanden for innbyggjarane i Jølster kommune til lensmannskontoret på Sandane eller Førde kan godtakast, og at ein kan rekne med at opningstidene på desse kontora vert meir fleksible. Departementet syner her til politimeisteren sin orientering om at avstanden frå Skei i Jølster til Gloppen lensmannskontor på Sandane er ca. 38 kilometer med ein normal køyretid på ca. 25 minuttar. Avstanden frå Vassenden i Jølster til Førde er ca. 20 kilometer med ein køyretid på ca. 21 minuttar. Avstanden frå Skei i Jølster til Førde er ca. 47 kilometer med køyretid på ca. 51 minuttar.

Departementet nemner også at politipatruljar skal kunne gjere publikumsretta oppgåver, noko som betrar servicen til publikum i høve til gjeldande ordning. Politipatruljar vil også kunne gje kortare reaksjonstid på grunn av at politiet i større

grad vil kunne vere på staden ved hendingar og behov gjennom kunnskapsbygd tenesteplanlegging.

Departementet vil elles nemne at politikontakten i den nye politistrukturen vil få ei viktig rolle i samspelet mellom driftseininga, lensmannsdistriktet og kommunen. Departementet meiner at politikontakten, som vil verte oppretta innan 15. juni 2017 i alle kommunar, på ein god måte vil kunne medverke til at politiet arbeidar tettare og meir strukturert med kvar kommune, og at dei vil få god lokalkunnskap om kommunen.

Politimeisteren har også halde fram at rasjonaliseringa av den lokale strukturen saman med andre tiltak i nærpolitireforma vil betre føresetnadane for å oppfylle målet om betre kvalitet på førebygging, politiberedskap og straffesakshandsaming.

Dei kommunane som vedkjem saka har vore lagt føre klagen i samsvar med forskrifta § 5 andre ledd.

Departementet finn, på grunnlag av dei opplysingar som er lagt fram i saka, ikkje grunn til å gjere om på Politidirektoratet si avgjerd om ny tenestestadsstruktur for Jølster kommune i Vest politidistrikt. Departementet held fast på Politidirektoratet si avgjerd 13. januar 2017.

Klagen takast ikkje til følge.

Justis- og beredskapsdepartementet si avgjerd kan ikkje klagast på, jf. forskrift om klageordning for kommuner som berøres av ny tjenestestedsstruktur i politi- og lensmannsetaten § 6 andre ledd.

Ein kopi av dette brevet er sendt til Politidirektoratet til vitande.

Med vennleg helsing

Thor Arne Aass
ekspedisjonssjef

Sven Olav Gunnerud
avdelingsdirektør

Kopi: Politidirektoratet

Dokumentet er godkjent og blir sendt utan signatur